

Clientenan di FAVI ta tumando un Curso di masashi bou guia di 'Stichting Blinden Massage Nederland'

RECIENTEMENTE FAVI y stichting Blinden Massage Nederland a cuminsa cu un curso di masashi pa personanan cu limitacion di bista.

E curso aki ta duna clientenan cu limitacion di bista e oportunidad pa bira masahista profesional. Cu e oportunidad aki e posibilidad pa un trabao ta bira posibel. Na e forma aki FAVI ta aporta na e desaroyo di e persona cu limitacion di bista pa asina mira con dispuesto e cliente mes ta pa bay dilanti.

Un limitacion di bista no ta un obstaculo, pero un oportunidad pa traha ariba cambionan den bida. Actualmente tin 9 cursista participando, di cual 8 ta di Aruba y 1 ta di Hulanda.

FAVI kier expresa gradicimento sincero na GAMENIGHT GIRLS cu a duna nos e sosten financiero necesario pa e proyecto aki. Nan ta e sponsor principal di FAVI. Tambe nos

ta gradici tur e otro sponsernan di Hulanda cu a contribui na Stichting Blinden Massage, pa nan por a trece e curso Aruba.

Nos kier gradici tambe meneer Paul Vrenken di Stichting Blinden Massage Nederland pa por a haci e curso aki posibel pa Aruba. Paul ta un masahista profesional cu ta duna curso na diferente grupo den e parti di Europa pero tambe Medio Oriente. Cu amplio experticio den duna guia.

Ultimo añanan el a cuminsa cu e proyecto di duna e curso pa persona cu limitacion di bista. Exitosamente un grupo di Bonaire (Zorg & Welzijn Goep) y Curaçao (Probista) tambe a logra ricibi nan diploma reconoci. Awor ta toca turno na nos clientenan di Aruba.

FAVI ta un fundacion cu vision, nos ta crea oportunidad ora e mundo a bira visualmente scur. FAVI ta duna guia na tur persona cu limitacion di bista di tur edad.

Bo kier sa mas di FAVI? Sigui nos ariba nos rednan social Facebook FAVIprimavera of Instagram FAVI_Aruba. Tambe por subi nos website www.favi-aruba.org.

Nos mensahe pa comunidad: Ta bo bista, cuid'e!

Michael Lampe nombra como Diplomático Cultural di Aruba

RECIENTEMENTE, Michael Lampe a keda oficialmente nombra como Diplomático Cultural di Aruba, un rol cu Lampe a acepta cu gran honor y sentido di responsabilidad patriótico. E rol di Diplomático Cultural ta fundamental pa desaroyo integral di nos isla: pa fortifica nos sector cultural, pa conecta cu mundo rond nos, y pa lanta e bos di Aruba riba escenario global cultural.

Diplomacia Cultural ta mas cu arte y expresion; e ta un herment strategico pa promove nos identidad nacional y pa yuda crea un Aruba mas sostenibel. Ta pa esey mes cu Lampe, cu un trayecto largo den e mundo cultural y musical, a dedica su estudio na e tema, investigando con diplomacia cultural por yuda eleva un pueblo. Su "academic paper" riba e tema ta splica cu cultura no ta simplemente decoracion di nos isla, sino e curason y e base pa desaroyo local, un desaroyo cu tin su raiz den nos propio identidad y cu ta conecta cu turismo sostenibel, e sector creativo y desaroyo social.

Gobierno di Aruba, reconociendo e balor strategico di cultura como motor pa progreso, a tuma e decision pa nombra Lampe den e funcion di Diplomático Cultural. E lo traha na Hulanda, pa representa Aruba na luganan unda



cultura ta biba y florece. Hunto cu NGO's y institutonan relevante, Lampe lo busca sinergia y aliansa, pa pone Aruba riba mapa internacional como un pueblo cu su alma ta cultura.

Michael Lampe ta gradici Prome Minister Mike Eman pa e confiansa poni den dje, pero tambe tur esnan cu durante aña a traha cu pasion pa proteha, preserva y promove e rikesa cultural di Aruba. Aruba ta un pueblo chikito cu un alma grandi y cultura profundamente hancra.